



Mahein Nia Lian No. 31, 16 Marsu 2012

Estrada A'at Impede Siguransa iha Eleisaun

Introdusaun

Estrada nu'udár facilidade ida atu fasilita ema hodi bele komunika ba malu husi fatin ida ba fatin seluk iha teritoria Timor-Leste tomak. Estrada mos sai meus ida lori ema halo atividade ekonomia hanesan lori produtu lokal bá merkaduria, atividade sosial hanesan bá serbisu halo viazen, no atividade siguransa hanesan halo partoliamentu no seluk-seluk tan. Maibé, wainhira estrada ne'e rasik iha kondisaun a'at no la bele uza entaun sei difikulta atividade hotu-hotu ne'ebé mak iha ligasaun ho estrada.

Tuir informasaun ne'ebé mak Fundasaun Mahein hetan katak maioria estrada iha teritoriu laran tomak liu-liu iha suku, subdistritu, distritu no nasional iha kondisaun aat. Estrada hirak ne'e aat tanba la iha rehabilitasaun ne'ebé planeadu husi ministeriu kompetente. Estrada hirak ne'e a'at tanba ho otas ne'ebé tuan tanba estrada hirak ne'e halo iha tempu okupasaun Indonezia.

Estrada hirak ne'e, uluk kompania Indonesia sira halo agora daudaun komesa monu tun ba mota laran, balu kuak, no balu kotu tanba bareira ne'ebé mak sata netik mota la forte hodi nune'e iha tempu udan mota sobu estrada sira ne'e ho afsil tebes. Kondisaun estrada a'at sira ne'e halo preukupasaun maka'as ba populasaun ne'ebé mak uza estrada hodi halo sira nia atividade no sai ameasa boot ba transporte publiku no privadu sira.¹

Maske durante ne'e governu aloka orsamentu ne'ebé bo`ot ba iha area infra-estrutura maibé comunidade seidak hetan benefisiu relasiona ho estrada. Orsamentu ne'ebé iha fo deit benefisiu bá emprezariu sira liu husi projetu ne'ebé sai barak maibé ninia rezultadu la-duun fo benefisiu bá populasaun.

Iha preukupasaun bo`ot husi publiku tanba iha tinan ida ne'e governu sei realiza eleisaun jeral, eleisaun prezidensial no eleisaun parlamentar. Tanba eventu ida ne'e rasik sei iha ligasaun dereita ho kondisaun estrada ne'ebé mak sei iha kondisaun a'at nia laran. Iha ligasaun tanba sei impede institusaun ne'ebé kompetente hanesan CNE (Comisaun Nasional Eleisaun), STAE (Sekretariadu Tekniku Administrasaun Eleitoral), PNTL (Polisia Nasional Timor-Leste), media lokal ho internasional no observador nasional ho internasional ne'ebé atu halo sira nia serbisu iha tempu eleisaun ne'e.

Fundasaun Mahein nia lian no 31 ida ne'e hakarak foka liu bá kondisaun estrada ho siguransa nasional liu-liu serbisu PNTL nian hodi fo siguransa bá elisaun jeral daudaun ne'e. Ita hotu hatene katak, eleisaun Prezidensial no eleisaun Parlamentar besik ona no hamosu preukupasaun barak husi publiku liu-liu institusaun ne'ebé mak atu realiza eleisaun ne'e rasik. Foin lalais ne'e, Comisaun Nasional Eleisaun (CNE) hatoo sira nia preukupasaun bá kondisaun estrada ne'ebé maioria a'at sai hanesan impkatu boot ba prosesu eleisaun tinan ne'e.²

¹Komunida Halerik ba Estrada, Jornal Independente Edisaun Dia, 02 Febreru 2012.

²Presidente Comisaun Nasional Eleisaun Faustino Cardoso iha radio Liberdade, Dili dia 22 Janeiro 2012.

Impaktu Estrada A'at

Hanesan temi ona iha leten katak estrada sai meus importante ba vida humana, tanba maioria povu uza estrada hodi halo sira nia atividade lor-loron nian. Maibé kondisaun estrada ne'ebé a'at halo povu la kontenti tanba impede ona sira nia atividade moris loro-loron nian. Dala barak povu la kontenti ho dezvoltamentu sobre estrada ne'ebé mak governu halo tanba ho kualidade ne'ebé la diak.

Dili nu'udár kapital ba Timor-Leste maibé kondisaun estrada la hanesan estrada iha kapital rai seluk. Estrada hirak ne'ebé kuak iha Kapital Dili fo mos difikulta ba comunidade sira nia atividade.³ Estrada aat halo povu kontinua halerik nafatin ba governu. Komunitade husi Manleu Comoro triste ho kondisaun estrada a'at ne'ebé difikulta sira atu hetan transporte atu tama ba sira nian bairo. Tuir Komunitade sira ne'ebé hela kleur ona iha aldeia ne'e senti triste tanba to'o oras ne'e diresaun estrada Aimutin ba Manleu to'o oras ne'e sei a'at nafatin.

"Kondisaun estrada a'at halo ami senti triste tanba atu hetan transporte. Tanba dalaruma atu tula sasan todan transporte mos la tama no lato'o ami nia uma. Pasiensia ami hi'it deit tanba kondisaun estrada la permite atu ami asesu transporte ho diak. Komunitade mos dehan wainhira atu tula sasan barak ,entaun, ami bolu Taxi atu tula hela sasan ba uma, maibé kondutor sira ezije selu karun tanba kondisaun estrada a'at."⁴

Preukupsaun estrada a'at ne'e la'os problema bá comunidade sira deit, maibé mos bá estudante sira tanba iha tempu udan comunidade no estudante sira susar teb-tebes tuir estrada ne'e tanba estrada refere nakonu ho be'e fóer no tahu-dodok.

Iha parte seluk, estudante husi Dili Institut of Technology (DIT) mos hateten tan katak ami estudante sira iha DIT no UNPAZ (Universidade da Paz) sente triste tanba iha tempu udan kondisaun estrada ne'e mak nakonu ho tahu no be'e fóer. Nune'e mos iha bailoron mos ami senti la diak tanba motor, kareta liu bá mai ami sai husi eskola mai hamlaha seidauk han buat ida maibé sei tuir dalan ami han uluk ona rai-rahun.

Tanba ne'e ami estudante hamutuk ho comunidade sira ezije bá governu atu hadi'a estrada a'at ne'e tanba estrada ne'e la'os povu deit mak uza maibé ami estudante husi DIT no UNPAZ sempre hetan difikuldade bá ami nia eskola.⁵

Sentimentu la haksolok ne'ebé hanesan, mai husi membru parlamentu nasional sobre asuntu estrada a'at, relasiona ho kondisaun estrada ne'ebé kontinua a'at Parlamentu Nasional urjentimente bolu Sekretariu Estado Obras Publika (SEOP) Domingos Caiero atu esplika kona-bá infra-estrutura ne'ebe maka kontinua sai problema iha teritoriu Timor Leste tomak.

Deputadu husi bankada Opozisaun FRETILIN Kestiona maka'as kona-bá osan ne'ebe governu gasta barak bá ponte, estrada, eletrisidade no seluk tan, desde iha tinan 2009 to'o 2012, maibe la hatudu rezultadu pozitivu bá situasaun fiziku Timor Leste nian. Deputadu bankada FRETILIN ne'e mos kritika maka'as, tanba tinan hirak nia laran liu-liu tinan 2009 governu rasik deklarara tinan infra-estrutura maibé la hatudu rezultadu ne'ebé signifkante ruma.⁶

³ Telejornal RTTL Edisaun Kuarta, 29 Febereru 2012.

⁴ Entrevista ho Mateus da Costa Komunitade Manleu iha Dili dia 29 Febereru 2012.

⁵ Entrevista ho estudante Ireina Guterres iha Dili dia, 29 Febereru 2012.

⁶ Gastu Osan Boot, Estrada Kontinua Aat "Parlamentu Nasional Bolu Urjente SEOP", Jornal Diario Nasional Edisaun Kuarta Dia, 15 Janerio 2012.

Relasiona ho estrada ne'e parlamentu nasional ho comunidade ejize bá governu atu hadia lalais ona kondisaun estrada no ponte iha teritoriu tomak hodi fasilita comunidade nia atividade, ne'eduni governu la bele dada tempu bebeik tenki hadia lalais ona.⁷

Kondisaun estrada ne'ebé mak a'at sei impede mos PNTL atu halo siguransa iha prosesu eleisaun jeral ne'ebé mak sei realiza mos iha Distritu Ainaro. Tanba maioria estrada ne'ebé liga ba suku balu iha fatin refere a'at total. Governu lokal hanesan administrador perpara ona kuda hodi tula ema ho facilidade balu ne'ebé sei uza iha eleisaun.⁸

Antes tama bá elisaun geral 2012, populasaun Defawasi, Subdistritu Baguia, Distritu Baucau mos husu governu atu hadia kondisaun estrada ne'ebé liga husi Suku Defawasi bá Baguia. Oras ne'e kondisaun estrada area ne'e a'at maka'as. Populasaun iha fatin refere halerik tebes bá kondisaun estrada husi Defawasi ba Baguia. Komunitade mos husi bá governu atu hadia estrada besik eleisaun atu nune'e fasilita povu hodi tuir eleisaun ho diak.⁹

Tama elisaun prezidensial no elisaun parlamentar ne'ebé sei halao tinan ne'e, povu iha Suku Afaloicai, Subdistritu Baguia, Distritu Baucau mos preukupa kondisaun estrada tanba estrada iha area balun besik kotu ne'ebé impaktu husi udan no rai halai. Kondisaun estrada iha Suku Afaloikai ho Oso-Una iha tempu eleisaun halo comunidade laran tauk oituan tanba problema estrada a'at. Estrada ne'ebé mak uluk halo tiha ona agora fo impaktu negativu tanba iha Suku Oso-Una estrada besik kotu ona.¹⁰

Estrada iha Suku Oso-Una kuandu kotu, ekipamentus eleisaun nian sei lalin deit tanba dalan alternativa seluk la iha. Tan ne'e comunidade husu bá governu atu fo atensaun maka'as bá kondisaun estrada ne'ebé mak besik atu kotu. Impaktu estrada a'at iha Suku Oso-Una kotu husi udan boot no rai halai foin lalais ne'e, sei impede serbisu eleisoens nian. Oras ne'e ita bele liu maibé kuandu la hadia estrada ne'e la kleur tan bele monu.

Populasaun sira nebe mak iha suku afaloicai ne'ebé sei tuir eleiasaun jeral iha tinan ne'e hamutuk kuaze 700 resin votantes, maibé estrada mak sei difikulta sira maske estrada ne'ebé liga husi Subdistritu Baguia hadia tiha ona foin lalais ne'e tanba impaktu husi udan monu rai, balun besik kotu fila fali.¹¹

Kondisaun estrada iha Subdistritu Liquidoe bá Aileu Villa mos daudaun ne'e grave tanba impaktu husi udan ne'ebé halo rai monu taka estrada. Povu Liquidoe mos senti tristi, tanba besik tinan 11 ona kondisaun estrada nein hetan antensaun husi governu.¹²

Iha suku Tebabui nia Estrada mos iha kondisaun a'at, estrada iha Suku Tebabui, Subdistritu Bobonaro, Distritu Bobonaro loke desde tempu okupasaun Indonezia a'at no isin lolon estrada nian hahu mout atu lakon ona tanba to`o agora seidak iha planu husi ministeriu relevante atu hadia.¹³

Komunitade iha Distritu Viqueque mos la satisfas ho kondisaun estrada ne'ebe liga Subdistritu Venilale, Distritu Baucau ho Distritu Viqueque ne'ebé fo impaktu bá movimentu

⁷ Parlamentu Nasional Husu Governu Hadia Lalais Estrada, Jornal Suara Timor Lorosae Edisaun Kuarta Dia, 16 Febereru 2012.

⁸ Administrados Distritu Ainaro iha telejornal RTTL dia 02 Janeiro 2012.

⁹ Komunitade Defawasi Husu Governu Hadia Estrada, Husu Solar Panel, Jornal Suara Timor Lorosae, edisaun 19 Agustus 2011.

¹⁰ Entrevista ho Komunitade Baguia Rui Gusmao iha Dili, dia 28 Febereru 2012

¹¹ Tama Elisaun, Populasaun Afaloicai-Ossouna Preokupa Kondisaun Estrada, Jornal Suara Timor Lorosae Edisaun Tersa dia, 21 Febereru 2012.

¹² Udan, Estrada Lequidoe La Kondis, Jornal Timor Post edisaun Quarta dia, 21 Dezembru 2011.

¹³ Suku Tebabui Infrenta Problema Estrada At, Jornal Timor Post edisaun, Sesta dia, 12 Agustus 2011.

transporte publiku tanba klot no a'at hotu. Tuir komidade iha fatin refere katak, durante ne'e aprova orsamentu hodi hadia estrada maibe estrada sira kontinua a'at nafatin deit.

Kondisaun estrada iha fatin refere a'at tebes, estrada nia luan mos hahu klot no barak mak koak ba mai hodi impede ba movimentu transporte publiku. Estrada ne'ebé mak a'at hanesan estrada iha area Mota Buanurak no Hasalaitula entre Subdistritu Ossu no Viqueque.

Komidade senti tristi tanba governu Timor-Leste fakar osan bakar ona ba hadia liuron maibe la kleur de'it a'at fali ona. Satan, estrada husi Larigutu nian mai to'o iha Viqueque a'at liu halo movimentu liu todan ne'ebé permite maka foo impaktu ba dalan no hetok a'at liu tan. Projetu hadia Estrada maka atu taka deit mak dalan kuak, hadia valeta, signifika katak ita hadia ida halo a'at seluk, hadia valeta kria fali tahu dodok iha estrada laran, tanba kompania balun kee rai iha valeta kuak soe fali mai iha estrada laran, entaun ninia impaktu mak agora dadaun ita rasik hare ho matan.¹⁴

Tanba ne'e, sujere atu governu uza ezekusaun ba kapital dezvoltimentu ho didiak hodi hamenus lian halerik povu nian kona-ba estrada. Tuir observasaun katak kondisaun estrada ne'ebé oras ne'e fo impaktu negativu (estrada aat) ba transporte publiku mak hanesan estrada Larigutu oras ne'e atu kotu total, estrada Buanurak besik mota hetan sobu husi mota ne'ebe oras ne'e kompania balun hadia ona maibe sidauk remata, inklui estrada Loihunu. Komidade sira mos preukupa tebes ho siguransa ba iha eleisaun agora tanba kondisaun estrada ne'ebé a'at no mota lori bele impede PNTL nia serbisu atu garante siguransa no paz iha prosesu eleisaun nia laran.¹⁵

Estrada laos sai preukupasaun deit ba komidade, maibe Polisia Nasional Timor Leste (PNTL) mos preukupa ho estrada no konsidera estrada hanesan impedimentu bo'ot ba Polisia atu halao kna'ar ho diak liu-liu perparasaun eleisaun jeral 2012. Komandante Polisia Distritu Covalima husu ba STAE (Sekretariadu Tekniku Administrasaun Eleitoral) atu fo informasaun ba governu kona-ba kondisaun estrada iha area rural ne'ebé dala ruma impede serbisu polisia sira nian tanba kondisaun estrada a'at.

Besik eleisaun maibe kondisaun estrada sei kontinua a'at, oinsa ita bele halo knaar ho diak, se kondisaun estrada la admiti. Kondisaun estrada agora grave tebes, nune'e lori problema propriu ba STAE (Sekretariadu Tekniku Administrasaun Eleitoral), CNE (Comisaun Nasional Eleisaun) no mos Polisia Nasional Timor Leste atu bele halao eleisaun ho diak, tanba estrada husi nasional, distritu to'o suku kuaze la iha kondisaun.

Komandanten PNTL Distritu Baucau Superitendente Faustino Guterres hatete siguransa ba iha eleisaun 2012 presiza koalia klean liu tan nune'e bele hetan forma ida diak atu bele halao eventu ema hotu nian. Komandante ne'e mos preukupa tanba PNTL sei akompanha material sensitivu sira ba iha areas rurais, nune'e siguransa importante tebes, tanba ne'e STAE tenki hato ba iha governu liu-liu ba orgaun ne'ebé kompetente atu tau matan ba kondisaun estrada iha rai laran.

Asuntu estrada ne'e mos sai preukupasaun bo'ot ba STAE ne'ebé hanesan instituisaun ida sei realiza eleisaun jeral iha tempu badak. Pereukupasaun STAE ne'e hatoo husi Adjunto Director STAE, Elvirio Moniz Fernando katak sei hatoo preukupasaun hirak ne'e ba iha

¹⁴Komidade Distritu Viqueque Preokupa Kondisaun Estrada, http://cjitl.org/index.php?option=com_content&task=view&id=12&Itemid=11

¹⁵ Intervistaho Alexandre Soares nudaer komidade subdistritu Uatulari distritu Viqueque iha Dili dia, 25 Fevreiro 2012.

Diretor Jeral STAE para hodi hatò'o ba iha ministeriu obras publiku hodi toma antensaun bã iha kondisaun estrada.¹⁶

Preukupasaun kona-bá infra-estutura hanesan estrada ne'ebé kestiona husi Instituisaun Comisaun Nasional Eleisaun (CNE), STAE, PNTL no comunidade sira sai mos nu'udar preukupasaun ida ba Fundasaun Mahein (FM) durante ne'e. Katak, asuntu estrada iha ninia tendensia ne'ebé boot hodi bele hamosu estabilidade durante periodu eleisaun jeral liu-liu ba eleisaun prezidensial no parlamentar.¹⁷

Hanesan kestiona husi Prezidenti CNE (Comisaun Nasional Eleisaun), STAE, (Sekretariadu Tekniku Administrasaun Eleitoral), PNTL no comunidade kona-bá estrada ne'ebé grave tebes maioria iha distritu hotu-hotu ne'ebé wainhira udan tun susar atu tama ba suku. Distritu Lospalos parte Luro no Suku Lore, iha Baucau, Subdistritu Baguia, Suku Larisula no Wakala. Kuaze iha Distritu sira iha suku barak mak sei atraza boot ho estrada. Ho ida ne'e mak tuir Fundasaun Mahein katak problema rstrada iha impaktu boot mos bã eleisaun jeral 2012.

Dalaruma mosu hanoin ne'ebé renda-renda hodi halo intepretasaun bã asuntu estrada ne'ebé FM konsidera nu'udar biban ida atu hamosu tensaun publiku durante iha prosesu festa demokrasia boot rua ne'e. Liu husi diskusaun badak, FM konsege identifika kona-bá asuntu temátiku hirak ne'ebé bele konsidera fasil atu kontribui ba estabilidade iha tempu eleisaun nian.

Tuir Fundasaun Mahein (FM): 1). Relasiona ho tempu udan agora ne'ebé konsege prejudika estrada sira ne'ebé ligadu entre nasional ba distritu no entre distritu ho subdistritu sei empata membru Polisia Nasional Timor-Leste (PNTL) halo ninia serbisu (kontrolasaun) ho efetivu tanba estrada a'at.¹⁸

Iha fatin barak ita hare katak wainhira tempu udan mota sei sobu no halo kotu estrada sira ne'ebé mak iha tanba bareira ne'ebé mak atu sata netik mota tuan hotu no fasil atu naksobu. Tempu udan hanesan agora mos sei prejudika ponte sira ne'ebé mak iha bele sai estraga tanba konsturasaun ponte ne'ebé mak la forte fasil mota atu sobu. Se ne'e akuntese sai risiko bo'ot ba PNTL atu halo patroilamentu no halo atusaun ruma karik mosu problema iha eleisaun.

2). Kondisaun estrada ne'ebé la favoravel bele konvida grupu illegal sira hala'o asaun kobransa illegal ba comunidade ne'ebé halo movimentu durante periodu eleisaun jeral ne'e. Dezempregu ne'ebé bo'ot iha Timor Leste hodi hamosu krimi. Kirimi hirak ne'e bele akontese tanba iha oportuniadade atu halo krimi. Hanesan iha estrada kuak no estrada atu ne'ebé mak dook husi comunidade grupu illegal sira bele halo asalta hanesan naok no halo kobransa illegal.

3). Problema estrada ne'e mos sei hahoris krimi organizadu hodi bele impede movimentu ka serbisu ekipa Sekretariadu Tekniku Administrasaun Eleitoral no Comisaun Nasional Eleisaun hodi hala'o serbisu iha baze hanesan halo verifikasaun ba fatin votasaun sira antes atu halo eleisaun. Kirim hirak ne'e bele mosu tanba oknum balu ne'ebé mak hakarak estraga prosesu eleisaun iha Timor-Leste ba sira nia interes ses privadu au entrese grupu nian.

¹⁶ Estrada Sai Perokupasaun PNTL Kovalima, Jornal Independente edisaun Tersa dia, 02 Agustus 2011.

¹⁷ Impaktu Estrada ba elisaun jeral 2012, <http://www.fundasaunmahein.org/2012/02/08/impaktu-estrada-ba-eleisaun-jeral-2012/>

¹⁸ Impaktu Estrada ba elisaun jeral 2012, <http://www.fundasaunmahein.org/2012/02/08/impaktu-estrada-ba-eleisaun-jeral-2012/>

4). Kondisaun estrada ne'ebé aat bele impede distribuisaun urnas sira to'o lalais iha fatin votasaun tuir orariu eleisaun nian no mos impede urnas to'o lalais iha nasional hodi halo kontajen tuir planu Sekretariadu Tekniku Administrasaun Eleitoral no Comisaun Nasional Eleisaun nian, wainhira eleisaun remata. Inpedementu hirak ne'e bele mosu karik wainhira halo kontajen iha sentru votasaun antes eleisaun remata mak fo sai kandidatu ou partidu politika balu mak lakon sira nia simpatizante bele uza oportunidade atu mai hein iha estrada sira ne'ebé mak identifika aat hodi halo asaun ruma ne'ebé mak bele estraga voletin de votus ho urnas ne'ebé mak iha.

5). Estrada ne'ebé aat bele habiban asidenti trafiku ne'ebé bele rezulta ema kanek no mate durante periodu kampania kandidatu Prezidenti no kampania partidus politikus sira, wainhira ema kanek no mate barak maka bele hamosu tensaun konfliktus iha eleisaun jeral. Hare ba kondisaun estrada ne'ebé mak maioria aat iha possibilidade bo'ot akontese asidenti trafiku tanba dala barak estrada ne'ebé mak kotu no aat la iha sinais tranzitu, hanesan iha fatin balu ponte kotu depois la iha sinais no akuntese asidenti depois hamate comunidade ne'ebé mak uza transporte.

6). Tuir FM nia hanoin bele mos iha biban boot ba grupu deskuinesidu sira hodi halo bronkas (estraga) urnas iha fatin sira ne'ebé kondisaun estrada la diak no susar hetan kontrolasaun husi PNTL.

Bele mos akontese wainhira hetan siguransa husi PNTL tanba tuir FM nia observasaun ba esperensia eleisaun 2001 no 2007 hatudu katak politika PNTL fo siguransa ba urnas sira ladun forte. Katak, politika siguransa hanesan bai-bain (manual) ne'ebé kareta PNTL ida iha oin, kareta CNE ka STAE ne'ebé tula Urnas iha klaran depois Kareta PNTL seluk husi kotuk.

Antes atu haninin hanoin ida ne'e, Fundasaun Mahein hakarak rekomenda ba instituisaun PNTL (Polisia Nasional Timor-Leste), STAE (Sekretariadu Tekniku Administrasaun Eleitoral) no CNE (Comisaun Nasional Eleisaun) atu review hikas politika siguransa ba urnas sira. Signifika katak oinsa tau membru PNTL ida ka rua hamutuk ho urnas iha kareta ida hodi nune'e bele garante diak liu tan siguransa urnas ne'ebe refere.

Kooperasaun PNTL ho Parte seluk

Atu realize siguransa ne'ebé ke diak iha kondisaun estrada ne'ebé maioria aat, importante atu halo kooperasaun hamutuk entre instituisaun ne'ebé mak relevante hanesan STAE (Sekretariadu Tekniku Administrasaun Eleitoral), CNE (Comisaun Nasional Eleisaun), DNTT (Dirasaun Nasional Transporte no Trestre) ho Ministeru Infra-estrutura atu serbisu hamutuk fahe informasaun sobre kondisaun estrada iha area ne'ebé deit mak aat, ponte hira mak aat no hira mak kotu no nia lokasi iha ne'ebé deit atu PNTL bele halo analiza hodi perpara kondisaun no ekipamentu ne'ebé mak iha hodi fo siguransa tanba hatene ona kondisaun iha fatin refere.

Importante mos kooperasaun entre PNTL no DNTT (Dirasaun Nasional Transporte no Trestre) hodi identifika fatin ka estrada sira ne'ebé at (fatin perigozu/wilayah rawan) hodi monta sinal trafiku atu nune'e bele fasilita movimentu kampaina kandidatu prezidenti no kampania partidus politikus sira labele hetan asidenti ruma.¹⁹

Kooperasaun ne'ebé mak halo tuir Fundasaun Mahein katak sei kria informasaun ne'ebé integradu entre instituisaun hirak ne'ee iha hodi halo planu tuir kondisaun ne'ebé mak ita

¹⁹ Inpaktu Estrada ba elisaun jeral 2012, <http://www.fundasaunmahein.org/2012/02/08/impaktu-estrada-ba-eleisaun-jeral-2012/>

infrenta. Kooperasaun ne'e rasik sei fasilita no hafasil serbisu Polisia hodi halo siguransa iha eleisaun jeral agora.

Konkuluzaun

Kondisaun estrada ne'ebé mak maioria aat sei fo impaktu dereita ba prosesu siguransa karik mosu pertubasaun ou konfliktu ruma iha fatin refere, sei fo impaktu tanba istituisaun siguransa hanesan PNTL la bele halo atuasaun ho masimu tanba kondisaun estrada iha durante kampanha, eleisaun no wainhira anunsia resultado eleisaun nian ba publiku.

Kondisaun Estrada nebe mak aat sei impede mos servisu institusaun relevante hanesan CNE (Comisaun Nasional Eleisaun) ho STAE(Sekretariadu Tekniku Administrasaun Eleitoral) durante prosesu distribusaun urnas ba sentru votasaun no wainhira lori fila uranas no voletin defotus ba Distritu no nasional.

Laos ne'e deit Estrada nebe mak ho kondisaun aat sei fo mos inpaktu ba observado no media sira. Ita nia elisaun nee rasik sei assiste mos observador sira nebe mak mai husi rai laran mosu husi rai liur atu observa festa demokrasia nebe mak iha halo. Aleide ida nee media nasional ho internasional mos sei hasoru problema hanesan wainhira atu halo kobertura ba eventu elisaun jeral nebe mak ita halo.

Rekomendasaun Fundasaun Mahein:

Bazeia dadus hirak iha leten ne'e, ba governu no instituisaun relevante, Fundasaun Mahein (FM) rekomenda:

1. Ba governu atu kria kooperasaun hamutuk entre instituisaun relevante hanesan PNTL ho Ministeru Infrastruturaatu fahe informasaun fatin ka estrada sira ne'ebé aat hodi PNTL bele halo planu ba siguransa.
2. Ba PNTL atu kopera ho Dirasaun Nasional Transporte no Trestre (DNNT) hodi monta sinal atu iha estrada aat nune'e bele fasilita movimentu kampania kandidatu prezidenti no kampania partidus politikus sira labele hetan asidenti ruma
3. Ba governu atu perpara fasilidade eskavatorhodi hein iha dala sira ne'ebé mak kotu atu suru-tetuk no loke dalan alternativa ba membru PNTL, CNE ho STAE atu realiza eleisaun ho diak.
4. Rekomenda ba PNTL antes realize elisaun membru PNTL hotu tenki koloka ona iha fatin sentru vota saun.
5. Ba CNE, STAE ho PNTL atu identifika dalan alternativa seluk hodi uza karik estrada iha kondisaun aat no labele atu uza.
6. Ba PNTL atu identifika estrada aat ne'ebé mak sai ameasa atu grupu krimi organizadu sira halo atentadu.
7. Ba governu atu halo estrada ne'ebé diak no qualidade atu fasilita povu nia atividade ekonomia.

Bibiliografia

Intervista

Intervista ho Komunidade Baguia Rui Gusmao iha Dili, dia 28 Febereru 2012

Intervista ho Mateus da Costa Komunidade Manleu iha Dili dia 29 Febreru 2012.

Intervista ho estudante Ireina Guterres iha Dili dia, 29 Febreru 2012.

Intervistaho Alexandre Soares nudaer comunidade subdistritu Uatulari distritu Viqueque iha Dili dia, 25 Feveiru 2012.

Radio no Televizaun

Radio Liberdade, Dili dia 22 Janeiro 2012.

Telejornal RTTL Edisaun Kuarta dia, 29 Febereru 2012.

Telejornal RTTL Edisaun Segunda dia 02 Janeiro 2012.

Koran

Jornal Diario Nasional Edisaun Kuarta Dia, 15 Janeiro 2012.

Jornal Independente edisaun Tersa dia, 02 Agustus 2011.

Jornal Suara Timor Lorosae Edisaun Kuarta Dia, 16 Febereru 2012.

Jornal Suara Timor Lorosae, edisaun 19 Agustus 2011.

Jornal Suara Timor Lorosae Edisaun Tersa dia, 21 Febereru 2012.

Jornal Timor Post edisaun Quarta dia, 21 Dezembru 2011.

Jornal Timor Post edisaun, Sesta dia, 12 Agustus 2011.

Jornal Independente Edisaun Dia, 02 Febreru 2012.

Internet

http://cjitl.org/index.php?option=com_content&task=view&id=12&Itemid=11

<http://www.fundasaunmahein.org/2012/02/08/impaktu-estrada-ba-eleisaun-jeral-2012/>

http://partidocnrt.com/index.php?option=com_content&view=article&id=624:komunidade-marobo-husu-ba-governu-atu-hadia-lalais-estrada-ba-bee-manas-marobo&catid=32:nasional&Itemid=47